

憲章外史續編

天啓注畧卷之十四

太學生臣許重熙編次

癸亥三年正月總兵毛文龍效巡方官例列四六考語特疏舉刺東征將士及海運委官以至朝鮮君臣經畧督餉部院司道登萊巡撫海防各道盡入薦牘御史江日彩劾其非制不報○御史易應昌進車砲製式○王三善解貴陽之圍擒賊將何中蔚三路進師使張孝出鴨池劉超出陸廣三善不能禦軍恣行搶掠賊皆守險遺財物餌之進土官蒙詔賣陣先逃賊

乘之官兵大敗姚旺等二十七將皆歿揚明措襁執
并力攻鴨池石砦土官覃宏化亦逃官兵潰無一人
存。

二月鳳鳥集于大嵬

三月命中使頒賞邊關將士大學士孫承宗奏日中
使關涉兵政自古有戒。皇上命使不遣大臣而遣
內臣且以四十餘人命使既行無容再議但念兵不
可玩或以割而成例臣願。皇上慈飭使臣無以此
行爲嘗。

四月貴州原任巡撫李燧陳新撫王三善解圍之功。

言久困圍城。闔門待盡。三善命道臣何天麒將兵七千從清水江進爲右部。楊世賞將兵萬人從都勻進爲左部。自將二萬同道臣向日升從中路進。劉超爲前部。賊阿成勇甚。超部兵張氏俊直前斬其首。三善之兵後至。遂進奪龍里城。安邦彥給其下私遁去。賊衆退屯龍洞。我師奪高寨。進兵畢舖。楊明楷率烏羅司兵如牆而進。賊亡奔。師乘勝抵城下。鎮道延之入。三善不可。曰：賊去未遠，不可卽安。遂管于城南設帳。大雪中。次移管宅溪。賊遁陸廣。○史永安亦奏三善親自督陣。向日升負弩前驅。孤軍而脫重圍。卽此是

奇功何必論。斬獲哉。第賊雖潰。尚以全力歸陸廣。四
十八頭目。惟安邦俊。歿于銃。此際更加慎重。賊必不
敢輕出。陸廣無奈。險易未嘗。倉皇深入。先鋒楊明楷
率兵萬人渡河。扎營。賊糾大眾接陣。明楷奮勇抵敵。
蒙兵先潰。雷光管兵亦潰。兵將奔逃。溺水歿者數千。
明楷竟被生縛。西賊糾蘭酋與安效良并力攻陸廣。
復并力赴鴨池。與總鎮張彥芳交戰。因秦兵浮糧將
盡。見賊勢重大。未交鋒。卽夜遁。而全營楚兵亦遁。何
監軍見勢孤。遂同張彥芳退回威清。賊乘勢返擊。以
致各兵奔竄。不可復止。逃兵絡繹漫散而下。人心震

動苗仲復肆荼毒龍里復爲占據屍橫四十餘里。而
叅議何副使劉鄉官孫鄉官楊舉人或家人被擄。或
子息盡。俸軍師李世將率兵三千被賊冲營。幾損其
半。重安楊柳一帶所在流劫。省城無續到之米。兵士
採米民間。攘其囊篋。兼採其妻女。旣撫之。復害之。卽
避難深峒者。亦不能保。今之急計。惟有疏龍里餉道。
以通會城。疏清平餉道。以通平越。今都勻圍尙未解。
銅仁紅苗思州黑苗羣起爲亂。逆酋造橋直欲進逼
鎮遠。則急復遵義鎮偏橋。可使兩江諸苗無變。○川
兵進攻永寧。各路前進。尅江崖圍。又進取天台圍。賊

具牛酒領數千人納降。差官分撫紅濠四十八寨。共斬獲一千餘級。

五月川將盧世卿擒僞御史汪澤遠。又秦翼明擒僞監軍夏奇雲。僞給事中孔聞過。又周定邦擒僞將陶勝顯。趙日光等。又湖將涂先睿擒僞將宋可據等。又胡平表各部下擒僞都督駱文奇等。奢賊降水西。借兵酋把魯仲英。尙扎赤水河。一半繇普市入新寨。攻永寧之前。將官羅乾象入蘭。焚其巢。○御史吳銜請舉視學大典。願陛下幸臨國學。寵進儒雅。博求海內。經明行修之士。如李光縉。陳繼儒等。徵詣公車。庶

樂執經問難之風

先朝羅倫舒芬皆以直諫著聲

詞者如文震孟輩正未可少列在經筵必能剖忠陳

讜昔漢臣謂長安天子之都親承聖化遠方於此則

傲○副將秦衍祚收復遵義○賊黨安鑾素有反正

之志監軍趙邦清招之因其妻子爲賊符國貞所質

不果來會官兵敗奢寅于羅村鑾遂約副總兵侯良

柱內外夾攻賊且覘良柱意良柱許之遂夜發兵挾

銃砲往鑾內應國貞潰走鑾挈妻子以歸邦清賞之

以示諸夷○朝鮮王李瑄爲其侄侏所弑侏久懷謀

逆與平山節度使李貴教練兵馬于外而內約其先

王庶妃王氏宮中舉火爲號領兵入宮縛瑋投火中
焚歿。侂遽自稱王。賄毛文龍及賫使推官孟養志指
李瑋暗通奴酋爲罪。其臣不服。有自盡者。文龍爲之
奏請登萊巡撫袁可立請討之。督餉侍郎畢自嚴言
不必議討。不可遽封。○貴州巡撫王三善奏報黔平
大計。不恨兵力不如。但苦糧餉不足。若得四五萬金。
旬日間便可收功。

六月羅平沙賊作亂。雲南巡撫閔洪學平之。

七月刑科曾汝召言。張差一案。發奸爲是。風竊爲非。
移官一案。移爲是。順從爲非。至經撫一案。喪師失地。

同則同罪爲是。左右袒爲非。筆削弗可輕也。○刑部定康應乾牛維曜李繼業失事獄詞。應乾備兵海蓋而民逃與逃。渡海潛踪。維曜監軍清河。督戰著傷。亦爲失事。繼業在遼不聞汗馬。入關有似狼奔。蔡汝賢殺退一枝。已見報叙疏中。奔潰忽起。扶劊入關。非得已也。○辛亥以實錄加恩監修總裁官。○奴酋於四月間以金州近海驅其人民盡入復州。其將劉興祚密圖反正。遣生員金應魁通於總兵沈有容。召兵取復州。巡撫袁可立疑之。兵不卽往。徐遣有容出海觀釁。而興祚已爲其下王丙所告。奴遂執興祚去。屠復

州并驅蓋州永寧民東徙空沿海地四百餘里○命
大監王體乾魏進忠并阿母客氏子姪俱世襲錦衣
官尚書董漢儒言會典及軍政條例並無故事一旦
使金吾世胄盡爲婦寺之胤不幾令武功人人無色
哉不聽○御史李玄劾姚宗文挑激債事御史霍鏌
劾范濟世饒有媚骨

八月葉向高揭請添註京堂科道○發內帑銀五萬
兩太僕寺馬價十萬充薊遼撫賞○工科陳爾翼言
徵募四出率皆市棍衙蠹銷費無算請停募使勿遣
○福建海上紅夷築城于澎湖○將行郊祀合用纓

馬內監令取之民間。太僕卿柳佐爭曰：御馬監二十四房，原備法駕之用，每歲費銀十餘萬。自萬曆來，何啻百萬，而不以供一日之用，何也？若借之民間，則有守候交納之苦，設久假不歸，京營將至缺馬。若行之今日，卽爲後日之例，有旨量借一千。

九月刑科解學龍奏曰：蘇轍有言，豐財者非求財而益之，去所以害財而已。遼兵舊額九萬四千，歲餉不過四十萬。今關門之兵亦止十萬，而月餉乃至二十二萬二千，遞至寧前新兵，月糧亦倍于舊。此餉之當覈也。遼潰以來，召募四集，額兵不問矣。乃薊密永昌

競招新兵。新兵日增而舊額如故。此額兵當清也。甲
仗硝黃給發不貲。一入營伍則耗不可問。且闔營而
逃。并闔營之器械盡去。甚至汰之自官亦忘器械而
不稽。此軍需當節也。奴長技在馬。我以火炮取勝。蜀
兵之克敵以步。羅將之歿守以銃。此馬兵當酌也。橫
金者如雲如雨。則有軍件書記捍門執爨。皆實餉所
養。不以摧鋒而以占役。此冗將當裁也。國初天下文
官五千四百。軍職二萬八千。萬曆間文增至一萬六
千。軍職增至八萬一千。今又不知幾倍矣。裁一官則
省一官之輿皂公費。歲省數十萬也。武職襲替舊制。

比試不中予半俸。三不中者降爲軍。何不遵也。國以民富。民富莫如粟多。京邊之米輸之民。不啻倍。給之軍。每斛僅易錢百文。是民費其六。兵食其一耳。而况轉作奸以相欺也。○戶科陳良訓以防微之說進規。有旨逮治。○刑部郎諱謙益薦妖人宋明時能役鬼被敵。兵部郎鄒維璉駁之。詔送薊遼軍門尋試無驗。乃逐。○鄒維璉言軍伍之弊。繇于武臣管缺。飽中貴之橐。而取償于卒伍。昔裴度當國。徑用高瑀而神策債帥之風革。爲今日大臣願之也。

十月輔臣向高疏請停刑。○越南星尙書吏部。○巴

卯 皇子生范妃出也。○癸未 上祭告 太廟及

南北郊。日重暈。旁生左右耳。○初，奴酋空金州城。

有海上遺民二百，潛移居之。毛文龍覘知，遣將張盤往撫，因僞報盤潛師克復大捷。已而盤畏奴不敢進。屯麻洋島兩閱月。至九月初二，奴奄至金州屠所居民，遂進兵麻洋燬其城而去。文龍揜其敗復，僞報遣兵渡江，有滿浦昌城之捷，斬首一百三十八級。時登帥沈有容業以盤大敗聞，下該撫查核。撫臣袁可立奏言：自金州空而張盤入，所以有文龍之報。及奴至而張盤敗于麻洋，所以有有容之報。至所稱滿浦昌

城奴歿二萬餘人者不交一鋒未可有考然其舉火放砲使奴奔命亦當優叙以勸得旨降勅褒賞文龍發帑銀三萬兩勞賞將士○貴州督臣楊述中奏報將士左世選等破賊于碗哈羊雀○御史吳牲言宛平大典畿甸首縣作令者視如傳舍轉眼報陞嘗委衙官署印一憑吏役處分小民憤爭細事數差狼坐魚肉甚至私債牽連竟行鎖押店家弱肉強食輦轂之下豈容若此○李維翰等朝審出入長安門械扭悉令家人手持該科劾奏詔查監者罪之

閏十月大學士承宗奏關東情形曰八里舖兵民六

百中前所兩將兵一千五百。居人可三千。田五百。嶺高嶺站兵三千。民可千餘。田可百餘頃。前屯將爲精率。教望其田表。曠若鵝鵝之祥。登其陴。高厚四周。屯可一千七十餘頃。歲可收七萬石。率教以去年率三十八人出守。漸爲團結。而今穡事穰穰。城且巋然。兵民可六萬。撫夷將爲王牧民。近遷興水。中後所將爲魯之甲地。饒多貲。兵民不下萬餘。田可千餘頃。尙荒其半。中右所將爲王。楹地饒于中後。田可千餘頃。而僅耕三百頃。回思春秋經過時。今居然全盛矣。曹莊民自團結五十餘家。寧遠去關遠。去虜近。城大而瑕。

姑以烈天壽司版築汪勳司鑿造後先接河東萬餘人合兵民不下數萬此城爲必據必爭之地促以今歲完築其田一千五百頃而佈種者四百頃覺華島去岸十八里龍宮寺地瀕海而肥土人附夾山之麓而居可五十餘家地蓋六百餘頃舊城遺趾可屯兵二萬令龍武兩管分哨覺華而於山巔爲臺樹赤幟下泊遼船北望黃毛山南望劉家山相對如兩門其南麓入海可爲堡屯萬餘人北之孤起者曰望海園樹赤幟置砲於上艤沙唬舟於下海門天設片帆不能飛渡矣寧遠東陸行黃沙自草墩臺宛然

至雙樹堡。蔭木猶存。十里至連山堡。城垣已盡。十里
至單笠山。可立爲砲臺。望大紅螺。可百里。東南去
倭堡二千六百餘步。海環其三面。東南有徑而下。險
南爲葫蘆套。西有瓦窰衝海山之間。可爲疑爲奇。如
以寧遠爲關。此地可當前茅。北爲塔山。卽中左所。又
東北爲杏山。平行難守。繇椴木衝而西北爲紅螺山。
西南抵威遠山。其東接康家山。折而東南爲蠟子山。
遂至首山。其西則白塔谷。歷興水。以西通於一片石。
臣擬從望海臺。北接首山。立闢城中。有平原。河水環
其下。可爲堡。直接康家山。以威繼光修薊門法爲臺。

垣約可六千餘丈。地當險要，可以盡收形勢于內，而外截東來之路。蓋據大勢于首山，而山海關在重垣之內矣。開屯之議，趙率教以修守之餘，試之而效。總計五城三十堡，兵民不下十餘萬，而可田之地當有五千餘頃。儘民力可占種者，許以三年起科，而因煤以鑄錢，因地以煮鹽，皆關門稍行之而效者。令袁崇煥經管寧遠、齊國寧，督水兵于覺華。臣與鹿善繼得，以備關城者，備前屯以守，爲戰以貽永逸。○南京齊庶人奢熾，與妄人陳鼎相謀不軌，卽時擒治。○川督朱燮元捷奏至。○灤州妖人王好賢爲人首發，撫臣

張鳳翔檄永平道岳和聲密捕之和聲召好賢請
故使歸治裝翌日僉尉孫繼先擒之縱之逸和聲言
妖賊既去地方無擾繼先有功可嘉御史袁化申林
之詔令仍緝獲○毛文龍僞報大捷稱斬首三百二
十詔賜金蟒獎諭發帑金三萬兩充賞○禮科郭興
言疏訟清吏程國祥劉永基張大猷○虜王卜失兒
阿不害貢馮○以毛文龍言建顯應龍王廟于鹿島
○戶科孫紹統奏曰祖宗朝南北卿寺司正少丞各
一二人總計不過三十員今籍名起廢添註總計一
百三四十員至今無地可置部屬各有職掌厭薄此

而覬覦彼引手衣鉢則賂章行臺省耳目近臣現缺
取用今需次候缺比于倉廵下吏甚至彌益小事而
侈言軍功腹裏善地而託言邊俸撫臣節鉞以資彈
壓也近來欲疏京堂先速巡撫專制之席未煖而推
報已至藩臬司道陞轉倏忽人人熱心京堂祇知速
化不管績成矣○尙書趙南星奏曰銓政之害于干
進皆繇良心汨沒以爲當然若主銓先無良心則誰
獎而誰抑今小民皆在水火中而居官欲得京堂爲
巡撫爲卿貳若絕無救民之意者救民莫過巡撫必
德望威稜能使貪污解綬其次則知府最急賢則廉

官不敢害民皆宜久任而優擢者近多討而得之何
惟謁選以討缺爲嘗也掣籤之法從所未有自萬曆
間始用之以示公遂有造籤之法討缺者無不如意
似宜變之以復祖宗之舊○叙畿輔平妖功陞廕選
撫張鳳翔等○四川仁壽縣山裂○湖廣報牛豕生
妖陝西報鼠妖

十一月丁巳朔冬至上祀天于圜丘○以皇嗣推
恩皇親進封王昇新城侯貴妃弟范守仁都督加輔
臣向高等官廕○禮科魏大中駁故福撫陳子貞冒
濫請謚乞勅該部以會典條例爲例不得准舊年被

例之例爲例○朗素臨邊索賞官軍收績于僊靈寺

守將王楹被殺○尙書趙彥據總兵馬世龍報防奴

酋西窺命將王威等分備喜峯古北口桃林界河且

言薊鎮臺兵始於戚繼光皆義武丁壯今改募北人

成法盡廢守望無人昨白馬關之警數十里烽燧不

傳可鑒已○王三善引兵深入大方賊遁入大箐賊

黨陳其愚僞降三善信之遂留郡縣其地令其愚招

安位及其母奢輝時奢輝母子焚大方老巢竄入火

灼安邦彥奢寅逃匿織金○趙彥覆奏貴州督撫楊

述中王三善意見參商請別設偏沅督餉官○王三

善參總兵麻鎮借募侵餉命逮之○錄川貴搗巢解圍功加朱燮元等官○以皇子覃恩蔭趙南星等子送監凡四十四人○安南都統黎維祺不能御下政在鄭松松死其子杜椿爭政搆殺國內大亂高平莫敬寬乘隙圖復直入其都維祺走海上杜統兵要之敬寬敗歸高平維祺復國杜令何惇爲諒山總兵擊敬寬大戰廣西巡撫何士晉以聞

十二月奴酋棄廣寧四衛城盡遷其民於海上○孫承宗請去經畧而移總督于關城以薊撫居密遼撫居寧前權歸于兩撫而督臣時問焉罷臣督師以省

二三或令臣姑還闕下得比識途之老馬如必不欲
臣離關則請去經畧總督只以臣一人督兩撫臣如
推督臣則願有請焉不肯居東者勿推任撫不任勦
者勿推同功不肯同過者勿推願局面不顧安危者
勿推如止以臣任關城亦願有請焉終年不令一覲
則不能任不時予餉定軍需則不能任不斷臣所奉
請而令兵部議可否則臣不能任身同外吏無以自
明李泌所謂待聖意殺臣而後永去晚矣○承宗又
奏登鎮不可議裁登鎮去三空河覺華島只兩日風
可至而東江路迂取金州于奴棄之後竟不能守乃

錢糧之給發。先東江而後登。有三月不餉者。率枵腹之衆而責破浪之功。難矣。○錄延寧邊功。賞廕文武官楊應聘。祁伯裕等三百八十九人。○御史高推劾奏舊本兵黃嘉善張鶴鳴當封疆淪喪。一籌莫展。而延寧叙捷錦衣世廕。清夜捫心。何以自安。有旨不必追論。○御史陳本言滕縣遭妖後歸里者。不肖府官多斃之杖下。一任胥吏變價。槩不許復業。黔蜀之難將官各捨子女以相餽遺。是衣冠而夷狄也。○蘇州通判楊姜抗忤太監李實爲實所叅。有旨逮問。巡撫周起元奏姜無罪。詔切責之。吏科許譽卿以紀綱。

替爲言併責奪俸○京師地震○韓城妄人劉買德聚謀不軌知縣梁克順獲之詔巡撫諸臣優叙○雲南巡撫閔洪學請開建昌驛路○毛文龍僞報統兵千人渡海分三路從鎮江寬奠靈陽行十餘日深入六百餘里至烏雞關奴酋禦之馬應奎僞退以誘其追躡至兩山間伏發奴衆大亂斬首二百七十八級○文龍誣奏其贊畫王一寧罪逮治論歿○貴州撫臣王三善捷奏至言斬首一萬八千安邦彥奢寅僅以身免○朱爨元敗賊于永寧○毛文龍之弟雲龍諫其兄不宜屢誑朝廷安坐報捷文龍恨之奏弟藐

法造謗特旨逮治○向高以三考晉官太傅上柱國
甲四年正月丙辰朔長興民吳野樵作亂殺知縣石
有恒主簿徐可行○王三善駐大方久軍心玩懈食
亦旣班師還省賊步步躡之至楊家海賊截路大戰
賊敗復行又二日抵化節賊衆擁出圍之官軍據山
頭解賊舉火焚山賊中起衝截官軍首尾不相顧遂
潰三善中鎗落馬爲所執全師皆覆監軍岳具仰同
知方明棟梁明泰副將秦明屏等皆歿○川師入龍
場擒逆首奢崇明及其妻安氏○向高請勿停添註
以廣起用允之○御史楊建烈奏京通各倉收米之

弊每厥索運官常例一百二十兩或以掛欠爲市而
賄入則那餘米補欠或將耗米作楂頭聽辦甲歇家
販賣而因之射利或放糧之日假各役討贖爲名用
小牌照出盜米至數千者或射操市販賣紅籌與舖
行每會五十石者或征逐子母間月借米與各役而
任意扣除倍得元寶者甚至剝削窮軍月米一石僅
足八斗又縱令斛夫袋中仍有剩米而莫敢言者陋
規大畧皆是以臣所聞惟主事劉萬春李孔度熊師
旦清介不苟表表一時至如主事蕭持籌潤囊醜態
雖經察處頃復叙功起用是在銓臣破局勸懲也○

御史李應昇奏曰禮義廉耻國之四維今情面重而封疆輕私人重而君父輕官爵重而倫義輕形存心死則病在內財用立國之本大倉倒囊一洗渙羣無計手足不仁則病在外譬如一局而奕者數人一室而鬪者數挺不以除病而以增病則病在醫馬上催而三路敗者何人中樞初而經撫敗者何人貪殘激變而貽患黔蜀者何人斷送封疆從未申嘗憲績奏金城之率教幾蒙逋虜之誅而萬有子賣欵議叙力爭國本之士晉且吝救黔之賞而表可立安坐加銜邪臣引去批答數行風采不揚觀望日甚

二月南京地震○毛文龍報擒斬奴衆三百七十餘
又稱內獲真奴四名逸其二以二人解到大學士孫
承宗縛以徇諸夷因奏薦文龍膽智真能殲奴○刑
科解學龍奏曰自廣寧潰散中國未嘗探彼一毫消
息而奴分布偵探如入無人之境田有倉雖就擒然
先有倉而颺去者不知凡幾奴未嘗忘中國也朗素
一虜中部落殲我數百人而吞聲不敢問可慮也現
在鐵衣未有的數撫臣欲點問而各帥不應無如之
何收買馬驟硝黃盔甲曾無經驗各道與各將修飾
情面茫然不問也兵馬操演不過千把總領百餘遊

手放砲吶喊。辰集未罷耳。大將稱觴爲樂事。近且買
美女于南都。何等時而爲此也。司農告匱。束手莫支。
三帥各領銀一萬二千爲治第之資。所貴大將爲其
申明軍令。乃伴作家丁。奸宿民妻。反緝打其夫。使坐
視奸淫。道臣具揭而鎮將不理。此何軍政也。大帥之
營。逃亡倍于他將。逃亡旣多不可問。乃取上班軍梟
首。驚衆何不仁也。營房每間領價六兩。而費五六錢。
築土爲牆。一遇風雨。露宿如故。馬料草苴十扣其半。
餉亦不卽呈報。遷延冒支。國家有多少金錢。堪此浪
擲也。將領晝夜聚飲。流連青樓。弓矢器械十無一有。

天下事尚恐言哉。至于撫賞一節，尤願與當事商之。蓋虜明挾奴以要我，奴明借虜以困我，謂虜受款而爲我出，力捍奴三尺童子知其不然也。晁錯謂匈奴之貪，不如勿賂，勿賂則變疾而禍小，賂之則變遲而禍大，畏其疾也不若畏其大，不可不深思也。○四川總督朱燮元處置簡首故地，以赤水河爲界，河以東龍陽一路屬貴州，以西至永寧屬四川，就永寧設道府與遵義相犄角。

三月總督王象乾以母憂歸。○孫承宗言捕獲奸細紛紛見告，罔不招獄成詞，而番快之捶楚何求不得。

自遼脫身來者流離更甚。大姓豪族流落中原，靡室靡家。既苦奇窮，相親相傍，動遭奇禍。誠念陷身于外者未必盡是甘心，而脫身于中者豈其願爲惡黨。我當開一面之網，借奴之殘，以散其不附之心。豈更密羅織之條，失我之寬，以斷歸來之路。○時各路承制驅逐遼民，淮揚之間，巨室來棲者，各遭奸徒侵掠。子女投湯繫繫，慘不忍聞。而江浙奸民，汎海逐利者，悉投文龍爲主，顯得人建州互市。奴酋寄文龍爲外府，珠參利獲百倍，往來高檣大艦，建牙稱平東府。莫之敢指。島中若民有不順者，文龍縛之爲奸細，或斬。

獻捷而遼民自此絕望于中國矣。○御史黃尊素以星變陳言時事十失。中言奴來鼠伏。奴去燕怡。悞國喪師者。蒙磨血守孤城者。薄酬。又言大臣依違。毀譽之念。轉爲模稜。積情面之心。旁觀却顧。致悞軍國。

四月川貴總督楊述中聽勸。以王三善陷敵。故也。命蔡復一代爲總督。兼貴州巡撫。仍賜之劍。○侍郎董其昌奏輯留中疏上進。并薦李維楨宿學史才。詔允用。○漕運總督呂兆熊擒獲倡亂妖民金科馬永等。于江淮間。○委毛文龍體訪朝鮮篡國事。○文龍奏報張盤敗奴于旅順。○刑科傅欒論左光斗魏大中。

不宜與汪文言相狎。請褫其職以爲比匪之戒。具言汪文言門役濫竊中書交通內外當誅。特旨下文言詔獄。○左光斗疏辯樹已實比匪不利清吏鄒維璉程國祥之在吏部與魏大中之轉吏科必欲逐之。畏臣持清議一併羅及。將用邵輔忠陷毛士龍故事矣。大中亦上疏辯。有旨命到任。科道甄淑袁化中各疏爲左魏剖白。○大學士向高疏乞致仕。具言臣之題用汪文言事迹甚明。而光斗大中之與相善尙屬暖昧。言官之計奏。舉不可開。駕帖之拿人。漸不可長。有旨慰留。○初文言宿依中官。諭訛朝貴間向高爲之。

選中書中外咸倚以相通已而自謂得朝貴聲援
揚揚夸毗訶斥縉紳人皆側目風波所借遂貽縉紳
之烈禍○少卿范濟世請封李選侍爲妃○女將秦
良玉奏其弟秦明屏灰于王三善之難其姪佐明祚
明突聞重傷有言勞之○禮科劉懋民言民間貧窘
日甚貪吏沿習成風因舉雲南一州守故謬指金盃
爲銅強納之府守又應天一府守行文于各屬徵禮
弊有正四正三之別又舉先年一張御史單騎赴郡
親訪官評一時風清弊絕願巡方諸使共破情面以
除民患

五月魏大中到任而恩有旨互叅未結何得到任刑科傅澠言明旨忽二忽三朝端且疑且駭大中之進退與微臣之論列俱未明白于天下至如汪文言亡命作奸刑章未付之司敗訊語徒恣其游移矣近臣因不測以示私將忠臣避中旨而箝口○福寧州軍變時州官徐某等不能理事州計所出入一憑倉官林廷貴盜竊賄賂軍民皆怨張天錫王一經揭竿而起大辱官吏凡十三日而定○許顯純掌北鎮撫司理刑○內傳出 聖諭毛文龍屢獲活夷功雖微小復遼之端在斯朕心嘉悅其稱奴酋賄買西虜意

不在小傳與樞輔鎮巡官防禦謹慎盤詰奸細毛師
用作速發解○大學士向高求去疏云年來人情分
門起復互相猜防以臣持論稍平共欲智之以彌縫
調劑今日縮手而莫知爲計矣○掌錦衣衛田爾耕
以緝捕有勞廕世百戶加太監擢進忠原廕姪二級
賜進忠名忠賢○貴州按臣史永安與學臣劉錫玄
互揭部覆永安在圍城時欲發都司黃運清出往新
添平越催兵懼其不濟復欲自往錫玄疑永安有去
志再三攀留揭稱欲護撫拔出城自請留城作質待
死永安疏叅錫玄獻城賣路陷兩院而自偷生并侵

撫臣李樞合三臣而論永安巡遠自視全城功爲第一。錫玄言語小過難泯其大節。李樞抗大難萬死一生。從前被論可恕。○登撫袁可立奏旅順去皮島最遠。恐毛帥邊長難及。而登鎮之駐師。樞相謂宜與文龍近。據文龍塘報。又欲其遠。請分旅順屬登萊。庶東西各分汛地。

六月吏科許譽卿奏曰。東南之境。羣猾恫喝。懾人財。富家兒多狂慙不制。非有斬木揭竿之勢也。歾如其法。人固無怨。如指龍華蛇山名色。以羅織之。恐吳越江淮之間。汲汲矣。未亂而喜事者。恐其不亂。及形見。

而束手曷若不擾爲壽也。○兵科章允儒請核兵餉
裁恩蔭。○孫承宗進呈車營圖冊。○傅繼陳良訓張
訥各疏攻趙南星左光斗魏大中鄒維璉。○魏廣徵
顧秉謙朱國禎朱延禧各大學士入閣。○左副都御
史楊漣糾劾東廠魏忠賢二十四大罪。曰票擬託重
閣臣責無他卸。自忠賢擅權旨意多出傳奉。徑自內
批壞祖宗之政一也。周嘉謨劉一燝顧命大臣一燝
親捧御手定大計嘉謨義斥養性清官禁。皇上豈
忘之。忠賢使孫杰論去。改。先帝之臣二也。孫慎行
執春秋討賊之義鄒元標明萬古綱常之重忠賢逼

之使去。而於黨護選侍者。加蟒玉以贈行。親亂賊而
讐忠義。三也。王紀鍾羽正功在國本。紀執法如山。羽
正清修如鶴。忠賢與沈淮交構陷之。不容立朝之直
臣。四也。最重莫如枚卜。妄頂金甌之伏字。圖爲貂座
之私情。五也。廷推皆不正點顛倒。有常之銓政。掉弄
不測之機權。六也。滿朝薦文震孟鄭鄮熊德陽徐大
相抗言。勸忤忠賢。盡令降斥。竟阻賜環。七也。傳聞宮
貴人荷上寵注。託言急病。立刻掩殺。皇上不
暇。婦人八也。裕妃以有喜得封。中外聞之矣。忠賢
旨勒令自盡。皇上不保其妃嬪。九也。中宮有慶

已經成男。乃繞電流虹之祥。化爲飛星墮月之慘。

皇上不保其子。十也。先帝青宮操心慮患。護持僅

王安一人。皇上倉卒受命。擁衛防護。安有微忠。忠

賢。矯旨掩殺。肉飽狗彘。擅殺忠義。十一也。討賞討祠

額。王言屢褻。建坊築塋。規制僭擬。十二也。今日磨中

書。明日磨錦衣。不知有何軍功相業。褻朝廷之名器。

十三也。用立枷之法。以示威。扳陷皇親。欲動搖三官

十四也。生員章士魁。以爭煤窰。傷其墳脉。托言開礦。

而致之歎。十五也。伍胡二生。以牧地細事。徑拏黑獄。

草菅士命。十六也。且明懸監謗之令。于臺省。科臣周

士樸執糾織監竟停其陞遷十七也。且開羅織之毒于縉紳。其鎮撫劉儵不肯殺人。人懼人竟令削籍十八也。且示移天障日之手于絲綸。魏大中奉旨忽傳詰責煌煌天語。信手任心十九也。傅應星等造謀告密。日夜未幾。不至典周文之獄。刑黨錮之碑不已二十也。創立內探親戚羽黨。立互盤踞安知無大盜刺客攬入忠賢。兼有劉瑾曹吉祥事。意欲何爲二十二也。進香涿州。鐵騎如雲。驚蹕傳呼。其歸也。駟馬羽幢青蓋。巖然乘輿。二十三也。聞今春走馬御前。皇上射殺。

其馬忠賢進有傲色退有怒言二十四也宮中府中
大事小事悉皆忠賢專擅奉奏之旨反覺皇上爲
名忠賢爲實涿州之行星馳票擬待到始發天顏咫尺之間漫不請決馳候于百里之外尙爲有天日耶
羽翼已成騎虎難下及今不治不知宗社何所托也
疏入番中兩日忠賢有乞罷疏付閣票擬向高請并
發漣疏叅詳內有旨先慰番忠賢而後傳旨云一切
政事皆朕親裁宮闈事情嚴密外廷何以透知毒害
等語是欲屏逐左右使朕孤立楊漣尋端沾直姑置
不問是時使向高不請漣疏而於忠賢疏溫旨令歸

私第未必無可沮之理。而向高必欲彰已之名，不肯默默幹濟，所以激至于一決云。○吏科魏大中等公疏言：漣疏未蒙發票，而忠賢疏先下，念其勤勞，錄其小心矣。又明日而漣疏下，沒其忠愛，罪其沽直矣。忠賢罪案代其任咎，忠賢逆德代爲分割，自疏自票，盡出忠賢之意，恐漣疏未及省覽也。懷冲太子何以不青，裕妃何以革封。皇上南郊之日，胡貴人何以暴亡，未有有其事而不傳之外者。忠賢不戮，客氏煽處，恐左右盡忠賢客氏之人。皇上真孤立耳。有旨下魏大中于詔獄，向高疏救，乃寢。○太僕少卿朱欽相

吏科許譽卿御史李應昇袁化中戶科陳良訓禮科
劉懋各特疏請斥忠賢詹事翁正春各科熊奮潯朱
大典陳奇瑜吳弘業霍守典孫紹統楊維新各道劉
璞劉芳房可壯洪如鍾李喬崙郎中鄒維璉各疏暴
忠賢罪惡俱有旨以沽直不諳責之○尙書趙彥等
合疏請退忠賢有旨不必以此過計○卿胡世賞等
合詞論忠賢有旨不必借此沽名○御史胡士奇奏
曰 皇上獎賞忠賢任事過直未知忠賢所任何事
果朝事耶 高皇不許內官干預政事果家事耶闈
人供掃除奉奔奏小忠小謹不可誇之 皇上席權

怙寵爲伏莽之戎不可言也不報○傳旨召閣臣向
高等至乾清宮不見上而退○向高爲諸臣所請
亦上疏請忠賢自罷并乞罷內操內傳旨楊漣非無
因而發卿等或見其肺肝追惟往事何忍忘忠賢之
勞聽其陳請乎○賞魏忠賢養僞錢功○郎中萬璟
劾奏忠賢盜權擅利諸不法狀有旨逮璟杖之內侍
羣毆于門立斃○卹錄大方陣亡將吏四十五人○
內侍胡進乘馬入禁門毆傷衛士巡視科臣杜三策
劾奏置不問○御史林如翥巡城有火者曹進傳國
與挾人命搶財鬪于途翥欲參之皆願受杖免參數

日後萬燦禍作。忽中旨逮汝翥。廷杖翥懼亡去。羣內侍疑向高匿之。百餘人直入私寓。辱及婦女。媢罵坐索。向高奏之。置不問。○大雨雹。○撫寧侯朱吾弼請處分忠賢。以靖蕭牆大禍。有旨奪俸。○江南大水。○冊封先帝選侍傅氏爲懿妃。李氏爲康妃。○擒蘭賊黨十三人。

七月林汝翥自詣遵化獄。撫臣鄧漢爲之請。詔仍廷杖之。○紅夷屢擾閩中。燒劫西寮古雲一路。撫臣南居益請嚴販海之禁。○六科廊火。○南科楊棟朝劾奏魏忠賢搜括南都之害。○御史李應昇爲慘

燥訟寃黃尊素王振奇柱三策周洪謨萬言揚疏
上有青報聞○御史劉廷佐請誅忠賢不報○勅封
關神爲帝君○大學士葉向高允歸

八月禮科霍守典請申明會典與服之禁。○南兵尙書陳道亨等公疏請去魏忠賢。○祭酒蔡毅中等請納忠言以安宗社。數日以來。但有及忠賢者。留中不發。如此蒙蔽。其中寧可測哉。

九月諭發內運庫及新造軍需器甲。差太監劉應坤紀用陶文齋至關門驗收。仍諭大學士承宗行邊。

載拮据勞苦特賜蟒衣彩段戰守各官軍行間奮力
犒御前銀十萬兩聽卿不時賞功凡軍國大計一切
情形機宜不時入告仍照閣中奏揭封固徑送朕前
朕時佇望焉○毛文龍大張告捷獻俘奏稱去秋有
牛毛之捷冬有烏雞之捷今春夏有金州官屯高嶺
復州海州遼陽等十七捷自金州旅順蓋州清河寬
奠遼陽鎮江計地千有餘里處處設有兵將先發制
人前後共斬首七百生擒活夷十四名獻之闕下血
戰諸將宜亟賜加擢以示激勸其陣亡官兵三百三
十八名併乞優叙表幽及俘至長安僅夷十二名兵

部傳單會審三法司刑科河南道畢集內止五人似

是真夷哀號莫解何語其餘幼童幼女老婦逐法屠

瘦顯係無辜于是道臣袁化中上言海外之戰捷未

可知然在我未嘗斬將奪城在奴不聞喪師失地小

小俘獲何足獻俘俟文龍或擒佟李二賊或俘奴父

子告廟宣捷賞功其於國典方重也不報○孫承宗

請戍罪臣楊鎬熊廷弼王化貞不允○是歲江南大

雨連三夏湖水海水皆溢禾麥無收南工科徐憲卿

爲蘇松常鎮四郡民告急請緩征派以息亂改折漕

米以救涵涵不報○磁州漳河西畔有土忽自墳起

耕民發之得玉璽一枚龍紐龜形方厚四寸文曰受命于天既壽永昌撫臣程經以聞

十月福建撫臣南居益捷奏至先是紅夷久據澎湖風濤洶湧官軍難近守備王夢熊屢征之不克撫臣于六月內誓師進攻夷守風櫃一城令夷目赴鎮海營求開一路又捧咬囉巴王檄文投撫院願拆城還地撫臣許之果於七月拆城運米下船開洋盡去獨存一樓爲高文律所居不去官軍薄之獲十三人○進封皇親王天瑞郭振明侯爵○山西撫臣缺會推謝應祥御史陳九疇言其昏耄不堪疑吏科魏大中

有私內旨九疇大中及吏部員外郎夏嘉遇皆降級
調外尚書趙南星都御史高攀龍各引罪求罷允之
科臣沈惟炳論救亦降調大學士韓爌朱國禎奏云
以一事而去兩大臣旨從內出徑發不繇閣票有傷
國體內報旨云冢臣憲臣全無公論不必救解○大
學士魏廣微陪祭失候日中祭畢然後闖入廟門禮
科劾之有旨置不問廣微上疏托疾言不過罪止失
儀而已此輩哓哓不顧路馬云云御史李應昇奏曰
言官耳目近臣言及乘輿天子改容廣微父爲言官
得罪閣臣以去聲施至今廣微不念乎奈何斥之爲

此輩疏入罰應昇俸一年○選郎張光前以冢臣之
去自劾求退允之○內出聖諭大小臣工曰元兇已
放羣小未安本當根株盡拔念雷霆未能驟施論爾
徒衆姑與維新洗滌腎腸脫胎換骨果能改圖仍當
任用如有怙其稔惡嫉夫善類將力行祖宗之法決
不襲姑息之政矣斯諭益魏廣微所草也稱忠賢自
結於外廷資崔呈秀爲耳目希求外援比李龍掌
院首發呈秀賊穢鐫秩去忠賢恨之故典文言之獄
將以警動諸臣及楊漣疏入忠賢顯然展微平
日最不喜東林力非其父叔允中允貞月爲遂欲倚

忠賢以行其志。攀龍逐而呈秀復召爲御史。小人爭趨時事日甚。忠賢不復有顧忌矣。

十一月署吏事侍郎。陳于廷會推吏尙書。以喬允升馮從吾汪應蛟名上。內出。聖諭曰。吏部都察院濁

亂已久。顯是陳于廷楊漣左光斗鉗制衆正。抗旨徇私。三克旣倡。率于前。誰敢不附和于後。楊漣怙惡不悛。註籍躲閃。于廷漣光斗俱恣肆欺瞞。大不敬無人臣禮。都革職爲民。追奪誥命。御史袁可立房可壯。選郎張光前。疏認會推與聞。各降調。起崔景榮尙書吏部。李宗延以吏尙書掌都察院。戶科陳良訓

請仍會推故事存舊章于勿湮留清議之一脉疏入
降級調外○大學士孫承宗奏稱遣將分哨已畢人
人奮揚撥入朝恭賀萬壽面奏機宜與諸臣商確可
否○聖諭承宗既膺重任一身安危所係亟還山海
有密計封進勿再有托陳○毛文龍以李永芳招與
同叛私書上奏有旨加文龍左都督賜蟒衣加陞其
幕將陳繼善等十八人爲叅將遊擊守備歲運糧二
十萬優卹陣亡將士家○內旨切責大學士韓爌引
疾歸○戶科陶宗道疏去疑衷慎名目鑒下情三事
降級調外○御史馬鳴世請飭計吏

十二月以御史梁夢環奏復逮汪文言○召還御史賈繼春徐景濂王志道

乙丑五年正月勅諭毛文龍聽朝鮮李倣襲封王爵○禮科劉懋慎請嚴謚典○左副都御史喬應坤在道奏李三才爲黨魁張問達趙南星高攀龍曹于汴段然爲同黨

二月內出 聖諭湖廣江西福建山東試錄策問有詆毀朝政語將正副考官八人俱降級調外○御史楊維垣奏奪侍郎王之寀官○大理寺徐大化誣奏楊漣左光斗招權納賄

三月奴削平金州城兵躡旅順文龍不能救守將張
盤被執朱國昌戰歿○上幸太學釋奠先師○雲南
撫臣閔洪學奏報擒獲逆酋安世龍○賜余煌等進
士○黔將魯欽劉超兵潰于水西督臣蔡復一自劾
并條上方畧○議遷徐州新城于雲山○諭獎毛文
龍遣太監王敏政胡良輔冊封李侗爲朝鮮王○鎮
撫司許顯純勘問汪文言受魏忠賢旨羅織趙南星
楊漣左光斗魏大中繆昌期袁化中惠世揚毛士龍
鄒維璉鄧洸盧化鰲夏之令王之案錢士晉徐良彥
熊明遇施天德請劾下法司忠賢仍發顯純嚴究文

言備極五刑呼天不言顯純自爲獄詞採楊維垣徐
大化所奏誣本謂熊廷弼之援獄皆周朝瑞黃龍光
顧大章受賄使然于是內傳旨遣緹騎逮漣光斗化
中大中朝瑞大章其趙南星等削籍撫按提問追賊
四月福建撫臣南若益添設澎湖守禦兵將○科臣
霍維華疏 三案是非大畧言擁立之時方從哲范
濟世顧慥俱在何煩劉一燾楊漣左光斗若功排選
侍者王安一人而李進忠劉朝無罪擬斬非黃克纘
力爭選侍何以安其生濟世請封一疏令人痛哭不
妃不后而何以垂簾風顛之張差劉廷元岳駿聲口

詞明白協當王之寀陸大受造舛繆之說開爨骨肉孫慎行起自田間借題紅丸加從哲以弑逆之罪小人承望風旨獨黃克纘王志道徐景濂汪慶伯鑿鑿足砥一時之柱江西監生楊維休草奏一介何從而注朝廷之起居伏乞將一應章疏宣付史館以垂信史○兵科王鳴玉請修舉屯田○聖諭工部三殿工程宏鉅各監局太監恭進助工銀十四萬兩發二廠收貯

五月御史顧宗孟請禁三科武舉濫受欽依○御史張樞陳驛遞之累○岳駿聲自疏起用王之寀逮訊

追賊○科臣楊所修請將三案章奏大畧編次成書
刊行天下○戶科薛國觀請嚴庶吉士之選

六月浙江撫臣奏獲紅夷船二隻夷二十八人報捷

○有胡汝鍾自稱越國公胡大海七代孫助喬應瓌

取結赴部願自督親丁勦奴有旨軍前候用

按越國公贈爵

非封爵大海無子養子德濟以失機削官没于陝亦

無子別有東川侯胡海以藍黨歿大海歿之年距此

凡二百六十四亦無七世可及之理○兵科陸文獻疏曰奴酋棄河西

而守遼移遼民而城東北示我息也誘我怠也議奴

以爲老而歇思而病者魑魅之談也毛文龍孤提一

旅駐札平島屢奏斬獲動輒以千百萬計卽韓白不

過是去歲八月金州削。十月旅順陷。若罔聞知。何勇怯爲兩截人。豈一旅能制奴之死命哉。○雲南撫臣閔洪學奏報收復霑益。又報敗安效良兵。○下周朝瑞袁化中顧大章魏大中楊漣于北鎮撫司獄許顯純先斃。汪文言竟成獄詞。日夕酷刑拷比。

七月修撰王應熊條議西南五策。○蜀府長史曹大受條奏制夷之畧。○御史倪文煥誣奏李邦華周順昌林枝橋取內旨削籍。○吏尙書崔景榮引疾辭任。○兵部議覆旅順事宜。言當毛帥之徘徊各島也。苟安焉以觀時變。漸乃成聚。遂有幸心。間有斬獲。張而

大之廟堂之上。不得不過情獎許。耀威遠方。是或二道也。夫文龍者。以爲征勦之大兵。而冒險以窺老寨。則誣也。以爲撫招之地。而護難民。無使爲奴。盡則不可少矣。文龍實置旅順于度外。而反乘部題之改屬。以揜其棄。可無問也。

八月科臣吳國華劾奏曹欽程穢惡。內傳旨國華及周詩雅熊江俱爲民。○內旨追奪李朴于玉立諾命。○御史張訥請廢天下講院。內旨鄒元標孫慎行馮從吾余懋衡俱削籍。鄭三俊畢懋良閑住。一切書院盡行拆毀。變價。○許顯純斃楊漣于鎮撫司。○尙書

周如槃侍郎下紹軾黃立極少詹事馮銓俱入閣辦事。○毛文龍獻俘解活夷七名。稱中路逃去二名。行至廣鹿島。文龍另解六人。將前人換去。科臣楊文岳言。俘夷重事。忽然解來。忽然換去。前解者不知何以處發。後換者不知何處得來。一生一殺。倏更倏替。生既不重。殺亦不威。如此事情。真同兒戲。不報。○冊封任氏爲容妃。○魏忠賢命決熊廷弼傳首九邊。

九月御史張繼孟陳江防八要。○左光斗魏大中袁化中周朝瑞悉爲許顯純所斃。○御史賈繼春請並定反書。魏忠賢取旨。楊漣左光斗串通王安倡爲移。

宮之事與魏大中周朝瑞袁化中黨護熊廷弼破壞
封疆貪其重賄託汪文言內探消息巧借別題以掩
罪廷弼已決楊漣已死顧大章係同惡送法司從重
擬罪爰書旣成頒行天下傳紀小說嚴加禁止○孫
承宗奏報陷沒大將○用科臣陳序言取內旨坐孫
居相贓銀二萬一千兩金九十兩下撫按追併削梅
之煥官○用御史卓邁言削奪楊鶴江秉謙夏之令
爲民蘇琰余令中林一桂起用○用御史倪文煥言
起用邵輔忠劉廷元姚宗文削奪崔景榮李孔度爲
民忠賢傳旨夏之令極詆毛文龍幾誤封疆差官扭

解來京吳世科冒濫兵餉拿送鎮撫司追賊○賜太監魏忠賢印信○用智鋌言削奪解學龍侯恪○用御史趙胤昌言削奪李瑾劉懋官○尙書李養正周應秋承魏忠賢旨定顧大章爰書上之大章自盡于獄坐贓四萬兩行撫按追比○逮惠世揚至下許顯純鍛鍊

十月朔容妃生皇子官妃父錦衣或云妃故容氏養女也皇子尋半歲薨○川湖督朱燮元陳會勦機宜言水西安酋向化日久忽因蘭酋搆煽用兵四年查安酋地方千里內則四十八目分據外則苗仲爲之

羽翼計能戰。雞苗不下十餘萬。所倚爲援者多在烏撒。所恃爲險者不過思。圃耳。滇之正兵。須出霑益。邊效。良佐。闕而別布。尋甸以杜其走。蜀之正兵。宜臨畢節。扼諸夷而別出。龍場以奪其險。黔之正兵。宜繇普定。徑趨逆巢。而別出。陸廣。鴨池以搗其虛。粵西之兵。徑出泗城。聲勢相連。臣率大兵。繇遵義期會並進。顧遵義逼近首地。運餉尤艱。自江津挽舟五日而至。綦江。綦江起早八站抵府。臣駐綦江。須餉集而治兵。未有張空拳而能作事者。倘籍天威立致底定。名爲多費。實節省也。○上宣尙書高第。至文華殿。賜劔坐蟒

玉帶銀獎命經畧朝鮮○中書舍人吳懷賢私評註
楊漣疏稿及遺工部郎吳昌期私書有事極必反及
正不遠語忠賢命楊寰孫雲鶴擒之下許顯純拷掠
死妻女悉斃○御史潘汝禎忠奏朱世守楊一鵬劉
策陸完學○魏廣微失歡于忠忠賢遣回籍

十一月用御史梁克順言削奇趙時用陳以聞官梅
之煥提問追贓○主事袁玉佩請削趙彥世廢并毀
鄒滕京觀碑○尙寶少卿劉心選疏叅孫慎行葉向
高張問達并請發前後論進樂疏付史館○以皇極
殿豎柱加恩閣臣顧秉謙丁紹載黃立極馮銓厥臣

魏忠賢部司臣黃克纘崔呈秀李養德楊夢衮潘

○員外郎胡芳桂上疏自辯命削奪胡永順陸師賢

易應昌房可壯歐騰霄官○削奪陳熙昌陳子壯父

子官坐試錄語刺時也○周如盤回籍○用張訥言

成故尙書趙南星○用御史上時英言削奪劉可法

唐暉官胡世賞閑住○用梁夢環言削奪張潑徐如

翰官唐世濟閑住○錦衣田滿耕邏執僧人本福有

詩扇爲揚州知府劉鐸所書譏刺時事忠賢出旨逮

之○御史田景新叅論唐世濟王惟儉王孟震李守

俊蔣謹傳旨各削奪○用禮科李恒茂言削奪莊欽

寺土僅守須彌島之士乎。宜嚴飭以察非常。○用御史倪文煥言。金世俊追贓米萬鍾。王繼謨削奪。○用御史王業浩言。削奪馬孟禎。韓竒象方有度。○用葉有聲言。削歐陽調律。翟學程公隴官。○用御史何可及言。削董元儒。倪應眷官。○尚書薛三省致仕。○用御史陳睿謨言。削奪劉廷諫。孫必顯。韋蕃官。○用御史石三畏言。削奪周炳謨。沈儆。張廷拱官。○用御史盧承欽言。削奪曹珍。董應舉。李遇知官。○用刑科潘士聞言。削奪吳之驥。施榮都。鄭宗周。何顯宗官。○用吏科趙興邦言。削奪練國事。李玄。王昌。祥。霍。鏐。楊。

新明官○用御史劉宏光言削奪談自省賴良佐張篤敬官○用科臣沈兆先言削奪周希令蔣允儀趙延慶官○賜尚書黃克纘馳驛歸○登撫武之望加兵侍郎○御史吳裕中劾奏閣臣丁紹軾取內旨裕中廷杖一百爲民

丙寅六年春正月御史陳以瑞疏叅少卿劉蘭郎中吳維祺呂克孝閑住○曹欽程賍穢狼籍爲刑科濟士聞所糾削籍○內諭都察院王之家周宗建張慎言熊開遇方大任及楊漣左光斗顧大章家屬行撫按追奪勒限速解○聖諭逆奴將至右屯不過爲搶奪

糧草之計而籍茲爲餌。政逆奴天亡之日也。向所患者望風而逃。今其申嚴法令。逃者盡斬。如再仍前僨事。朕決不爲姑息。○順天撫臣申用懋奏。薊鎮邊垣連年坍塌。班兵約量歸薊。齊力興修。○奴酋入犯圍攻寧遠。日袁崇煥禦却之。○聖諭袁崇煥血書示衆將士。協心滿桂等捍禦孤城。矢心奮勇。朕心嘉悅。戶兵兩部發銀十萬兩爲犒賞之資。

二月袁崇煥僉都御史。滿桂趙率教各總兵都督同知。○順天府尹沈演陳制禦十款。○命員外孫元化製西洋砲。○削御史石三畏籍。○下劉鐸刑部獄。請

本福扇詩爲歐陽暉所製并逮之○鹵簿大駕功定

魏忠賢加恩三等

又徐復陽疏參曾汝召魏士

前郝土膏司禮監

召羽翼移官士前倚恃能

廷弼土膏策文誦

降方逢年章允儒顧錫麟

丁乾學熊奮渭

削籍土膏坐贓提追○復

陽又疏黨根

禍于城外以泯書院舊迹濫

贈宜奪鮑應

殺爲邪臣王允成疏薦宜從削

奪○成張慎言逮周宗建繆昌期○削總兵楊麟籍

○徐兆魁周應秋徐大化希魏忠賢旨定惠世揚成

罪○惠賢取李實空印奏稿填周起元等名參奏取

內旨周起元周順昌高攀龍李應昇黃尊素俱係邪黨遣官旂逮問○海鹽戲子武長春舊爲毛文龍門子見逐潛來京城與同夥李應試李柱周應元李棟薛奎酒館集唱爲人所告東廠坐名長春爲李永芳之姪送刑部擬斬立決俾奉內旨忠賢獲奸細有功封任良卿肅寧伯

三月安邦彥率衆數萬渡江與官軍連戰數日總兵魯欽在陣回營賊兵逼之夜半官軍大潰欽自刎死○經畧高第引病免袁崇煥爲巡撫○諭發帑四萬兩并各宮及太監所助共銀十六萬兩又應用神器

大小號砲一千八百位。擇火藥二萬斤。鉛子十萬斤。弓二萬箭。六十萬刀。二萬着。太監劉應坤。陶文紀。用孫茂枝。武俊。王蒞朝。鎮守山海關。○大學士顧秉謙等上公疏。參論閹對禁近之人。奉旨。周大成。久依門戶。鄭崇光。見在追贓。汪汝祥。汪涵。皆汪文言宗族。俱削籍爲民。○侍郎崔呈秀。直陳要典之原。大約追理閹範圖說。憂危竝議。妖書所繇來。曲揜鄭貴妃。奪嫡之實。以爲護持國本者罪。又以癡人闖入宮禁。爲偶然進藥。爲忠愛。移宮爲悖逆。曲揜方從哲。阿姦之實。以爲擁立嗣皇者罪。而歸于東林之標榜。決裂而于

言未有湧幢小品先行語。蓋欲借以排陷朱國禎者。比忠賢命讀小品自序。以爲閑話。而國禎免于難。○定肅寧伯第宅朝房。○御史李懋芳劾罷元詩教。○御史何早叅區大倫。魏說削奪。○畢自肅代袁崇煥爲寧前道。○王之臣經畧遼東。閩鳴泰代爲總督。封西洋砲爲大將軍。○刑科黃承昊奏散遣遼人出關。○安賊統衆燒劫麻姑孫官二堡。遂至貴州城下。撫臣王璠按臣傅宗龍各疏告急。

四月毛文龍俘解夷二十九人。稱是八會寨之捷。擒真夷在陣遺棄鐵甲二十一領。死馬三十八匹。陣

亡官兵五十三名。兵科薛國光叅言：文龍海外數載，自信牽制之能，朝中亦推牽制之功。今正月奴大舉入犯，屠掠內地二十餘日，已班師操演瀋陽。一似不知有牽制者。文龍所報尙是去年十月事，其於大舉槩乎未聞，何益於封疆大事哉！奉旨：奴犯寧遠，已經三月，文龍竟不知覺，何云牽制？據所住須彌島，去奴寨二千里，去寧遠亦二千里，遠不相救，文龍當自審處，以圖結局。毋徒以獻俘塞責。○都察院周應秋奏：削御史劉大受王心一官。○下周宗建繆昌期北鎮撫司獄。○逮騎至無錫，高攀龍先一日沉池中。遣

表云臣雖削籍舊屬大臣辱大臣則辱國矣謹此
稽首謝恩以效屈平之沉○忠賢傳旨成熊明遇黃
龍光鄧漢鄒維璉徐良彥○叙寧遠功閣臣顧秉謙
丁紹軾黃立極馮銓與原任孫承宗魏廣徵各錦衣
世千戶廠臣魏忠賢加恩三等世都指揮使劉應坤
胡良輔紀用陶文尚書王永光各廕子錦衣官袁崇
煥加侍郎滿桂趙率教左輔朱梅祖大受諸將各陞
賞有差○江南撫臣毛一鷺以蘇州民變聞先是緹
騎之過吳下者騷擾暴橫吳民爲之罷市及周宗建
逮緹騎索賂無厭吳民洶洶幾亂周順昌之逮也一

鷺實陰主之一鷺素不傷于民而順昌仕閩時有惠政閩人之商于吳者聞其難皆泣下思執香送之順昌故持身節儉閩黨亦皆誦德及緹騎至順昌因服詣公府緹帥索賂未滿不卽開讀繇是街傳巷播人人皆來看順昌有類佩韋者先夕飲諸俠少于家酒酣語日明日周吏部行矣或曰此魏忠賢矯詔也則皆罣且泣比開讀諸生王節劉羽儀沙舜臣文震亨楊廷樞等羣擁一鷺于門乞代士民祈請一鷺呵之民衆一擁皆入有直前問緹帥緹帥厲聲曰來厥殿上首遠官何容鼠輩置喙衆譁曰固知爲魏賊矯詔空

拳競搏萬衆狂呼一驚逃于廁緹卒或匿斗拱間或
升屋走知府寇慎挺身曉諭衆素服慎乃漸散而怒
猶未已適緹帥逮黃尊素者道經胥江榜笞驛官誅
求供應衆怒復集遂焚其舟沉其輜重于水諸緹卒
汨水而遁越數日民情稍定順昌間行與緹帥出境
變聞忠賢大駭緹帥遂不復遣已而一驚密捕顏佩
韋馬傑楊念如沈揚周文元斬之而黜諸生王節等
五人○贈劉光復太常卿○李應昇聞蘇州之變卽
辭父母迎緹帥于途緹帥張有成清謹知變以詔遣
常州府不開讀竟去是勝州縣民疊苦緹騎之虐人

思乘事攘臂聞緹曉去建鼓○李應昇周順昌
下北鎮撫司獄○郎中李白春改吏部郎閣臣願不
謙索其重賂白春拒之尋取內旨削奪

五月許顯純斃繆昌期于獄○應天巡撫毛一鷺劾
奏毛士龍充戌夏嘉遇問徒姜志禮爲民○禮科張
惟一以糾許志吉罰俸○喬應甲叅削孫瑋職并奪
其廕○王恭厥地變震響一聲塵土四飛屋宇塌倒
者盡都城西南一方庭樹皆拔男婦死者五百餘人
皆赤身無絲縷或以爲火藥發而無煙內傳 聖諭
戒勵羣臣消弭○黃尊素遵撫按解到下鎮撫司獄

○薊州地震○大學士丁紹軾退朝如有所見歸寓
暴卒或云魏忠賢賜藥○督師王之臣收納抄化餘
衆時抄化爲奴酋襲取部落無歸者悉來款塞○顧
秉謙進三朝要典副本又恭進 神宗實錄副本○

貴州按臣傅宗龍奏報王國貞攻河沙壩俘斬羅鬼
多人張雲鵬與安邦彥大戰于趙官堡賊敗奔潰

六月工禮二部請給魏忠賢祖先祭葬○初五日京
師地震天津宣府大同同日震歿傷甚衆○河道總
督李從心奏報自馬頰口至陳瑤溝另鑿一河計程
六十七里從此運船改錄陳口諸漕遠避○督師王

之臣奏帥臣滿桂與經畧袁崇煥不和崇煥上疏認
罪○崇煥以賊情暫緩請贖畫孫元化回部元化繳
還銀五十兩有旨嘉其急公○許顯純斃周順昌周
宗建于獄

閏六月以災異戒諭羣臣○許顯純斃黃尊素于獄
○魏忠賢收受欵縣民吳榮告詞奏發旗尉拘提富
民吳養春一家到廠究問○浙撫潘汝禎請建魏忠
賢生祠于西湖○朱爕元回籍守制閔夢得代爲總
督控制川雲貴湖粵五省○許顯純斃李應昇于獄
○御史袁鯨劾尙書王紹徽閑任巡撫喬應甲候勘

初結徽作點將錄以水滸傳賊號配題葉向高趙南
星等欲一網盡之○御史李燦然劾徐紹吉閑住職
方郎吳殿邦爲民紹吉慘殺諸臣竄身史局尋亦寵
衰見斥○周起元下鎮撫司獄○奴兵圍長昂殺之
擄其妻子○奴兵破抄化營遂滅交安兒一部○元
詩教趙興邦閑住忠賢初借從哲之黨滅除衆正衆
正旣滅諸附日進從哲之黨漸次驅逐○薛貞疏頌
魏忠賢草場滅火功加原廕二級○尙書徐兆魁爲
廠疏所糾閑住兆魁故羅織惠世揚顧大章誣案者
忠賢又稱皇親李承恩曾用龍袍在獄與方震孺對

鐸謀畫御史溫國奇爲之求寬俱提問加罪○馮銓黜免銓與政時有所救沮已密謀欲去呈秀爲呈秀所愬故忠賢斥之

七月刑科黃承昊請行綜覈之法○施鳳來張瑞圖李國楷俱大學士入閣○畿輔淫雨爲災王之臣袁崇煥各奏報一路官舍民房倒塌○崔呈秀尚書督工周應秋吏部馮嘉會李春燁尚書兵部郭允厚戶部薛貞刑部傅陞曹思誠黃運泰俱戶尚書房壯麗左都御史

八月叛酋安效良縛其黨蘇應龍來獻曲靖道王鎮

殺其縛獻之人效良復叛。○東廠傳旨抄沒吳養春家私。將黃山地畝盡充公用。○有旨立限嚴追程夢唐家私銀十三萬六千兩。吳養春家私銀六十餘萬兩。山場木植銀三十餘萬兩。山場地三千四百餘畝。魏忠賢發奸有勞。蔭世錦衣指揮使。○殺劉鐸曾雲龍彭文炳劉福于西市。方景陽戮屍。○有旨徐自強送刑部。皇親張國紀着省改。蓋忠賢欲借自強所供以傾搆中官也。○奴兒哈赤病歿。

九月左副都御史劉廷元請重修光廟實錄并論廣西副使曹學佺有野史紀畧言與要典相反請毀

其書削其籍。刑科黃承昊請設餉司。內旨承昊係東林。不自引退。條陳塞責。着削職爲民。皇極殿告成。內旨。殿臣魏忠賢體國赤心。于原封伯爵晉肅寧侯。旅順守將李鑣棄軍逃去。陞霍維華太僕卿。毛一鷺兵侍郎。削奪朱欽相倪思輝。顧秉謙引退。魏忠賢厭鄙其無耻也。

十月命南京守備特建魏忠賢祠于孝陵之前。名曰仁濟。毛酋乞炭挾賞不遂。搶掠寧疆等堡。叅將張承憲戰沒。南御史徐復陽削奪。復陽誣郝土膏自劾。尋亦被逐。順天府丞劉志選劾奏。皇后父

張國紀○曹文衡報獲東充賊○內官監疏頌魏忠

賢殿工有勞特旨晉其姪魏良卿爵寧國公世襲官

太子太保○遼撫袁崇煥奏遣喇麻僧鐸南木通奴

酋○御史梁夢環疏頌魏忠賢功德并叅何士晉諸

臣內旨稱殿臣忠貞勞瘁功績茂著何士晉程註沈

惟炳俱削籍爲民程良籌係程註之子除名不用○

傳陞孫杰徐大化楊夢衮各工尙書○內諭兵部廢

臣奇勛茂著廕其孫魏鵬翼世錦衣指揮王體乾梁

柱等七人同之劉天錫等三十七員各廕世錦衣百

戶○朝鮮王李倬奏辯國內事情有旨獎慰并慰毛

文龍稱毛脚而不名

十一月削奪詞臣唐大章劉弘訓劉鍾英○梁夢環
叅御史梁克順削奪同類相攻也○南京地震○南
京紫城地內積朽生烟○御史張汝懋請追冒費諸
臣內吉游士任揚嘉祚房可壯行撫按提問追比○
御史陸獻明陳黯事畧言勑之難撫之不易運餉煩
苦貴陽連年不耕斗米二錢安位年長自有
土之念不難擒獻逆彥所當酌議

十二月東廠三年類奏有旨廠臣加廕一世錦衣指
在貧賤策奪之勸加太子太保○內旨田爾耕緝訪

有功原歷正千戶加二級○福建賊楊六等就撫○
傳陞邵輔忠兵尚書郭鞏呂純如霍維華兵侍郎皆
添註加總督閻鳴泰太子太保尚書黃運泰尚書戶
部○加許顯純太子太保○總漕蘇茂相請封金龍
四大王爲通濟平浪元帥○張鶴鳴仍以太子太傅
兵尚書總督川湖雲貴廣西軍務○袁應泰疏頌厥
臣與閣部諸臣一時稷契之選閻鳴泰王之臣劉應
坤陶文紀用同心恢復敢卜必成○張問達捐貲助
邊有旨問達病故可憐完銀解進未完者勸家貲定
奪○南京守備太監請建厥臣祠于皇城東賜名崇

勲○御史劉徽疏叅毛士龍房可壯樊尙燦有旨嚴
提熊廷弼家屬追贓尙燦爲民與士龍可壯各提問
追贓○允劉志選所叅逆黨逮王之寀成孫慎行

丁卯七年正月蘇茂相請建厥臣祠于鳳陽 皇陵之

次賜名懷德○黜生顧同寅私撰祭熊廷弼文事發
到殿斬于西市○給內臣關防涂文輔總督太倉節
慎庫崔文昇總督河漕李明道提督河漕○盜竊大
壇神噐

二月初二日 今上出府成婚○遼撫袁崇煥奏逆
奴求款情真○許志吉請變賣所抄吳養春房產起

解○毛文龍奏請內臣鎮守海外特旨獎勞命太監
胡良輔鎮天津苗成金捷郭尙禮駐皮島發銀五萬
兩砲銃六百六十餘位捍盔甲鎗刀弓箭千萬件火
藥二千斤○川督遣叅將楊明輝入水西諭安位爲
安邦彥所殺○削奪吳牲梁元柱等○戶部承旨九
卿會議生財縮費之道○瑤王惠王桂王詣陵謁
辭

三月三王辭朝啓行之國○毛文龍奏報奴人欲侵
皮島未果遂東破朝鮮之義州○山東巡撫李精白
奏報青州民家耕牛產麒麟○蘇松民奏稱瓜洲完

運不便有旨朕與厥臣軫念云云嗣後聖諭皆上
與厥臣並稱而不名。下參政胡士容于鎮撫獄。
命毛文龍出師救朝鮮。澄城縣民變殺知縣張斗
耀。削奪蘇繼歐徐楠龔世法彭鯤化劉永祚等。
閩鳴泰于通州昌平各建魏忠賢生祠名曰崇仁日
彰德李監又建祠于通之西關曰懷仁主事何宗聖
建于長蒲曰顯德巡撫劉詔建于密雲曰崇功各極
土木之費窮工技之巧祠中像以沉檀雕鏤手足活
動如生人腹中腸腑皆金玉珠寶爲之每日上食饗
祀官吏士民過不謁拜者立遭箠辱祠立大石碑皆

張瑞圖所書。顧秉謙黃立極施鳳來等互撰諛文。遠
近稱之。曰尙公。至細民間巷偶語。亦必曰尙公。而不
敢名吏民上奏頌德政者。日月不絕。○曾國禎建魏
忠賢生祠于盧溝橋。曰隆恩。張化愚建于崇文門。曰
廣仁。

四月主事呂下問勘賣黃山拘刷良民虐取民遂作
亂焚其廨求殺之下問遁免。○皇陵失火延燒四十
餘里。○奴兵破朝鮮之雲從鉄山文龍將士聞之各
洶洶不自安都司毛永顯先逃叅將高萬重統領衆
軍劉璋劫掠島中軍民財物婦女同麾下七百餘人

駕船逃去都司馬承勛亦領兵六百餘人繇陸西奔

○文龍奉報晏廷關之捷○削奪姜曰廣胡尙賓丁

進○山西巡撫曹爾禎建魏忠賢生祠于五臺賜名

報功遼東督撫閻鳴泰建兩祠曰元功曰茂德太和

祠曰照德良牧等署張永祚建三祠曰存仁洽恩永

愛庶吉士李若琳建于上林苑曰感恩蘇松撫毛一

鷺建于華亭曰德馨楊邦憲建于江西曰元勳

五月諭袁崇煥封疆事重還體嚴臣綱繆石畫以保

無虞○諭刑部佟惟奇等嚴臣密計逃偵就獲惟奇

入高婦女處決傳首○諭戶兵工部應補餉銀十萬

登津本色五萬刻期前發再選水兵數千策應毛帥
合用器具并速發○總兵趙率教稱奴退與五里下
營次日放馬繞城遊走○奴衆回巢西虜遣使賞英
等請賞○總兵滿桂奏報援兵東行爲羣虜攔截于
箴籬山人人奮勇力戰虜死甚衆將令不許割級俱
爲虜自負去止有丁白雄于馬上斬一虜首恐有埋
伏不敢窮追陣亡將士羅忠等六十名○削奪晏清
倫肇修曾陳易錢策杜詩王應熊沈際等○監生陸
萬齡請建魏忠賢祠于國學之傍巡撫郭增光與鮑
奇謨各建忠賢祠于河南賜名戴德巡撫朱某建于

延綏名祝恩。巡撫王黠。建于大同。名嘉猷。○通政司經歷孫如洌。建祠于宣武門。李春茂請給庫銀二千兩。賜名茂勛。祠成。春茂賀疏有曰。至德莫可名言。下情惟有祝釐。

六月奴寇寧遠。諸將憑城禦之。砲傷奴兄。召力兇。奴兵解圍。退去。經撫閻鳴泰。袁崇煥各奏。厥臣先事縹緲之功。總兵趙率教。奏稱仰仗魏忠賢妙算。紀用及諸將左輔朱梅等協力。紀用亦稱奴賊數萬。蜂擁我兵。用火砲矢石擊。死數千。有旨。厥臣秘謀妙算。屢建奇功。奴胆已寒。滅之有日。兵部臣霍維華覆奏。厥臣

茅上尙覺其輕。良卿太師尙餘一級。海寇鄭芝龍作亂。屢犯漳泉沿海州縣。閩鳴泰復建魏忠賢生祠于畿南。名旌功。各巡撫李精白等建于山東。曰隆禱。精白獻頌。有至聖至神多福多壽語。建于湖廣曰隆仁。濟寧曰表勛。承天曰鴻惠。崔文昇同宋禎。漢建于淮安曰瞻德。又莊謙建祝恩祠。李燦然建褒勲祠。○禮尙書來宗道疏頌。極臣功德。與上並稱不名。又諛呈秀奪情。稱其母在天之靈所欣慰。○何可及頌疏五皆。皇上上公並稱。○豐城侯李承祚請封魏上公爲王。

七月 上疾久不視朝孟秋 廟享禮以魏良卿代

行○袁崇煥以病乞歸賜兵尚書王之臣尚方劍駐

寧遠○傳陞李精白曹爾禎爲戶尚書○許其孝建

魏忠賢生祠于揚州名瞻恩上梁日正值大行哀詔

至其孝督率羣僚吉服拜祠而後迎詔惟副使來復

不與○毛一鷺王珙建祠于虎丘周鏞督修戴德祠

毀王府民房二千間起宮殿九楹○時周應秋三十

九疏請益封忠賢子姪爲公侯伯郭允厚四十疏請

給莊田祿米蔣鳳翔四十七疏請給第宅鐵券李蕃

呼忠賢爲九千歲李時馨疏堯水益成聖帝姚宗文

頌上公間出名世李燦然上公帝簡爲生孟紹虞元
老篤生應通龔萃蕭上公柱國元勳馮嘉會稱頌十
六疏張樸建四祠頌十二疏李精白建三祠頌六疏
秦士文祠頌七疏卓邁二祠一頌虛承欽頌二疏請
刻黨籍碑示海內劉徽頌十二疏李從心頌五疏黃
運泰頌十疏李嵩頌七疏建二祠張三傑頌五疏曹
爾禎頌三疏黃憲卿二祠二頌張養蒙二祠一頌汪
裕頌七疏劉弘光溫臯謨朱童蒙王大年徐吉宋禎
漢劉連祖各建祠諛頌范濟世李養德安伸孫國禎
郭尙友張文熙楊惟和何廷樞陳朝輔陳爾翼智鋌

汪若極呂純如牟志夔周維持劉漢余令中許可徵
周良材張一經夏敬承郭希禹顏鵬辛思齊郭興言
朱慎荃郭如闇何早虞大復葉天陞葛大同夏之鼎
李宜培谷曲意獻媚無所不至而士風掃地矣攷
國初胡藍之獄凡盃酒有連者悉遭族誅今顯然附
戴顧得保首領牖下雖於國法未伸而 聖恩可謂
寬大之極矣○削奪賀逢聖楊汝成閃仲儼馬之驥
劉垂寶等

八月 上寢疾不視朝 三殿告成 禮部請擇吉臨
御有旨朕方在靜攝少需擇期而行○魏廣微亦于

家○徐時泰孫之獬主順天試中崔鐸陳其慶張士
範主應天試中周錄後各覆試曳白應天策以符命
革命爲問○加寧國公魏良弼太保封魏明望安平
伯加少師魏良棟東安侯太子太保○十八日

上疾大漸有旨諭吏兵部奉聖夫人客氏子侯國
興擬封伯爵○廿二日司禮監承諭傳陞黃立極王
之臣少師施鳳來張瑞圖李國楨崔呈秀薛鳳翔少
傅孫杰楊夢衮李春燁少保周應秋郭允厚黃克纘
太子太師李養德吳淳夫蘇茂相黃可威房壯麗太
子太傅霍維華曹思誠范濟世劉遵憲袁可立白所

知太子太保、呂純如、田吉、張曉、張我續、尙書、許宗禮、呂圖南、張九德、張文郁、單明、詡、岳駿聲、李春茂、王之采、都御史、其餘侍郎、卿、貳等幾餘百人。○卽日傳皇后懿旨。大行皇帝於申時崩逝。合行喪禮。禮部具儀來看。又諭命婦免哭臨。又明日羣臣詣信府勸進。○九月上尊謚曰達天闢道敦孝篤友章文襄武靖穆莊勤慈皇帝。